

# PM letak kalungan bunga sempena Hari Pahlawan

UM - 1 AUG 2003

**K**UALA LUMPUR 31 Julai — Datuk Seri Dr. Mahathir Mohamad hari ini menyempurnakan istiadat meletak kalungan bunga di Tugu Peringatan Negara sempena Hari Pahlawan 2003 sebagai mengenang pengorbanan pahlawan gugur mempertahankan negara.

Perdana Menteri memulakan upacara simbolik sempena Hari Pahlawan peringkat kebangsaan itu dengan memeriksa perbarisan kehormat.

Lagu-lagu patriotik turut dikumandangkan dan sebuah sajak bertajuk 'Pahlawan Ku' dideklamasikan untuk mengenang jasa pahlawan negara yang terkorban di medan perang sejak Perang Dunia Kedua, zaman darurat dan terkorban di luar negara semasa menjalankan misi keamanan di bawah mandat Pertubuhan Bangsa-Bangsa Bersatu (PBB).

Dr. Mahathir memulakan peletakan kalungan bunga di hadapan tugu diikuti oleh Panglima Angkatan Tentera, Jeneral Tan Sri Mohamad Zaidi Zainuddin dan Timbalan Ketua Polis Negara, Datuk Seri Mohd. Bakri Omar.

Majlis itu turut dihadiri para menteri Kabinet, timbalan menteri, pegawai kanan kerajaan dan diplomat asing.

Turut meletakkan kalungan bunga Panglima Tentera Darat, Jeneral Seri Mohd.

Shahrom Mohd. Nordin, Panglima Tentera Laut Diraja Malaysia, Laksamana Datuk Mohd. Ramly Abu Bakar dan

Panglima Tentera Udara Diraja Malaysia, Jeneral Abdullah Ahmad.

Penghormatan juga diberi

kepada bekas panglima-panglima tentera dan para anggota tentera yang berjuang semasa Pendudukan Jepun awal ta-

hun 1940-an serta Presiden Persatuan Bekas Tentera Malaysia, Datuk Muhammad Abd. Ghani dan Presiden Persatuan Bekas-Bekas Polis Malaysia, Datuk Mansor Mohd. Jaafar.

Hari Pahlawan disambut 31 Julai setiap tahun bagi mengenang dan menghargai jasa pahlawan negara yang terkorban dan cedera mempertahankan kedaulatan agama, bangsa dan negara.

Di IPOH, Sultan Perak, Sultan Azlan Shah berkenan berangkat ke majlis perbarisan sambutan Hari Pahlawan 2003 peringkat negeri di Dataaran Bangunan Perak Darul Ridzuan.

Lebih 500 anggota beruniform terdiri daripada Angkatan Tentera Malaysia (ATM), Tentera Udara Malaysia (TUDM), Tentera Laut Diraja Malaysia (TLDM), Polis Diraja Malaysia (PDRM), Bomba, Persatuan Bulan Sabit Malaysia dan Pasukan Kadet Sekolah menghadiri perbarisan itu diketuai oleh Mejar Uzir Abdullah dari 2 Rejimen Renjer Diraja Kern Sved Putra.

Turut hadir Menteri Besar Perak, Datuk Seri Mohd. Tajol Rosli 'Ghazali dan para Exco kerajaan negeri. Majlis disertai dengan bacaan puisi, diiringi irama muzik lagu 'Pahlawan Ku' oleh Pancaragam TLDM. Sambutan Hari Pahlawan diadakan serentak seluruh negara hari ini.